

21.10.2020

UKA2020/82

Sullualuup siunissami aqquusaalutarineqariartuaarnissaa sillimaffigalugu, sapinngisamillu annertunerpaamik periarfissaasinnaasunik atorluannissaq siunertaralugu nunatsinni international frihavnimik sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut Naalakkersuisut nassuiaasiornissaat pillugu Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.
(Atassut Inatsisartut gruppe)

Sullualuup siunissami aqquusaalutarineqariartuaarnissaa pillugu aalajangiiffissatut siunnersuuteqartoq qutsavingalugu Siumumit imaattumik oqaaseqaateqassuugut.

Siullermik suliassaq nutaajunngilaq, tassami ukiorpaaluit matuma siornatigut nunatta kitaani illoqarfanni assigiinngitsuni eqqartorneqartareerpoq oqaasertai allaanerulaaginnarlutik.

Suliassaq peqqissaarutassaavoq aammalu isumatusaarutassaalluni, minnerunngitsumillu anneruniussutaasariaqanngilaq pingaanerpaavormi nunatta kitaani nunatsinnut immatsinnullu kingunerluutaasinnaasut akisussaassusilimmik eqqummaariffiqineqartariaqarmata.

Sullualuup ukiuni kingullerni imaatigut angallannikkut periarfissanngoriartuaarnera nunarsuarmioqatitta eqqummaariffingaat nalunngilarput, aammalu periarfissanngorpat qularnaateqanngilaq peqqissaarullugu mianeralugulu ingerlaarfiulissasoq aqquusaalutuginagu allanituulli aqqutaassooq pingaarutilik.

Siumumiik pingaartilluinnarparput suliassamut taama ittumut suleqataanissarput, aamma nalunngilarput qalipaasersorata nunatsinnulli iluaqutissaq annerpaaq angussagutsigu aqqutit suut atorutsigit pitsaanerunersoq nassarissaqqaarlutigu.

Mianerisassatta ilangilluinnarpaat nunatta inoqartuaannarneranut tunngaviusut piniakkat peqqissaaruteqqinnaassagatsigit, taamaattumik aqqutit ajornanngippat piniakkat najortagaasa aqquusaartungaalinnginnissaat tamaviaaruttariaqarparput minnerunngitsumik piniakkat aallaaviattut taasinnaasarput PIKIALASORSUAQ ingerlaarnermi ungasinnerpaaffissaatigut ingerlavigineqartariaqarpoq.

Taamatuttaarlu pingaaruteqarluinnarpoq umiarsuit sikusartukkut
ingerlassutigineqarsinnaasut nakkutigeqqissaarnissaat, ilisimavarpummi
umiarsuarsuarnik ajutoortoqaraangat qanoq uumassusilinnut
equinerlutsigisinnaasut taamaattoqartillugulu ukiorparujussuarni uumasut
uumassusillillu nerisareqatigiinnermut pingaarutillit piuneerutsinneqassasut
taamaanngippallu najungaq qimattussaagaat.

Qulaanilu Siumumiik taakkartukkavut pissappata nunatsinnut
ajunaarnersuaqartussaavoq tamannalu tamaviaarullugu
pinngittoortinniagassaraarput, oqareernitsituut tamanna
Partiilersuunneqarsinnaanngilaq.

Sullualuk aqusaarlugu nunarsuatsinni immap silaannaallu kissakkiartornerat
ingerlaannassappat ingerlaartoqartarnissaa pinngittoortinneqarsinnaagunangilaq,
taamaattumik Siumumiik isumaqataavugut umiarsualiffiusinnaasoq nunatsinni
pilersinneqatussap iluaqutigisinnaasai ajoqutigisinnaasaalu pillugit Naalakkersuisut
nalunaarusiornissaat pinngittoortissinnaanngunangilarput.

Taamatut oqaaseqarluta periarfissat misissorneqarnissaat eqqarsaatingalugu
aappassaaneerneqannginnerani ataatsimiititaliamut susassaqartumut
innersuupparput, sulilluarnissaannillu kissaallugit.

Nikkulaat Jeremiassen, Siumut.